

راضي علي الطهطاوي

جلا.. جلا

أشعار بالعامية المصرية

مارس ٢٠١٩



راضي علي الطهطاوي

الإهداء

إلى: روح أبي " رحمه الله "

وإلى أمي "حفظها الله"

إلى: زوجتي وأبنائي

إلى : إخوتي.. وأقاربي وأصدقائي

إلى : زملائي.. ومعارفي وجيراني

إلى : أساتذتي...وتلاميذي

راضي علي الطهطاوي

عضو اتحاد كتاب مصر

محاضر مركزي بوزارة الثقافة

رسول الإنسانية

يا رسول الإنسانية ** يا قمر للعالمين
ربنا بعثك هدية ** للهداية واليقين
الجمال من ضي نورك ** والفؤاد نبع الحنين
يا رسول الإنسانية ** يا قمر للعالمين

يا رسول الإنسانية ** يا اللي مبعوت للسلام
بالآيات القرآنية ** تمحي م الدنيا الألام
دعوتك نبع المحبة ** خير مخلوق ف الأنام
رب صلّ عليه وسلم ** يا شفيع المذنين
يا رسول الإنسانية ** يا قمر للعالمين

يا رسول الإنسانية ** رحمة بتفيض ع الوجود
بالحروف النورانية ** وحد البيض ويّا سود
يا رسول الله عفوا ** لو بيجهل بيك حقود
رب صلّ عليه وسلم ** دا العيون ليه مشتاقين
يا رسول الإنسانية ** يا قمر للعالمين

أمي سر وجودي

أمي يا أمي يا شمس حياتي ** أمي يا أحلى حروف كلماتي
أمي يا أمي يا نبع حنان ** أمي يا سر وجودي وذاتي
بعد العمر ده كله يا أمي ** ولسه ف عينك طفل صغير
مهما قسينا بتيجي تضيي ** حبك عمره ف يوم ما اتغير
لو شفتي إيدي على خدي ** دي عليكي عمرها ما تعدي
تجري بلهفة تقولي ضنايا ** وفكر المخ يجيب ويودي
أمي يا أمي يا شمس حياتي ** أمي يا أحلى حروف كلماتي
أمي يا أمي يا نبع حنان ** أمي يا سر وجودي وذاتي
لو عيان أو حتى ف غربه ** قلبك يبقى ف جمره ونار
لو عينك تلمحني ف كربه ** تبقي الدنيا معاكي مرار
حافظه عيوني لو بتكلم ** إحساس قلبك ماله مثيل
قلبك نبع الحب الطاهر ** عمره مايعرف يوم تمثيل
أمي يا أمي يا شمس حياتي ** أمي يا أحلى حروف كلماتي
أمي يا أمي يا نبع حنان ** أمي يا سر وجودي وذاتي



غلطة عمرى

مهما هتكذب تاني عليًا ** مش راح اصدق كدبك تاني
كنت حبيبي وضيّ عنيًا ** كنت لروحي النص التاني
ليه بالهجر قابلت عواطفي ** وخليت نبض القلب يعاني
غلطه عمرى ان انا حبيتك ** ده انت بجد حقيقي أناني
مهما هتكذب تاني عليًا ** مش راح اصدق كدبك تاني
كنت بريئة وعلى نيّاتي ** وقلبي بأول نظره اتشد
أول حب معاي في حياتي ** جه من كتر القسوة اتهد
وتعلمت دروس من غدرك ** انّى ما آمن تاني لحد
مهما هتكذب تاني عليًا ** مش راح اصدق كدبك تاني
كنت حبيبي وضيّ عنيًا ** وخليت نبض القلب يعاني
غلطه عمرى ان انا حبيتك ** ده انت بجد حقيقي أناني
مهما هتكذب ثاني عليًا ** مش راح اصدق كدبك تاني

هَلْ هَلَاله

هَلْ يَا ناس رمضان بهالاله ** والمستني حبيب أهو جاله
والإيمان هيصفي نفوسنا ** وأيام الصايم تحلاله
تلاتين فرحة ف تلاتين يوم ** رحمة ياناس في السما والأرض
شهر التقوى وشهر الصوم ** حظك ياللى تؤدى الفرض
تلاتين فرحة وتلاتين ليلة ** ضيّ فانوس ع الباب بيقيد
شهر اللمة يا ناس والعيلة ** والأفراح والرزق يزيد
هَلْ يَا ناس رمضان بهالاله ** والمستني حبيب أهو جاله
بالإيمان هيصفي نفوسنا ** وأيام الصايم تحلاله
شهر عبادة وشهر صيام ** حظ العاصي لمّا يتوب
زكى بماله وصلى قيام ** ربك يمحي بفضلله ذنوب
صحة وعافية وجسم يروق ** والبركات تكثر من خيريه
نتعلم م الصبر ندوق ** واللى جعان هيحسّ بغيره
هَلْ يَا ناس رمضان بهالاله ** والمستني حبيب أهو جاله
والإيمان هيصفي نفوسنا ** وأيام الصايم تحلاله
ليلة القدر العطر الفايح ** رحمة وخير لطلوع الفجر

نازلة ملايكة بسر نفايح ** ليلة بألف تزيد ف الأجر
هلّ يا ناس رمضان بهلاله ** والمستني حبيب أهو جاله
والإيمان هيصفي نفوسنا ** وأيام الصايم تحلاله

الحلو الأمور

حبيبي الحلو الأمور ** مين زِيَّه ف طبيبته وحلاوته ؟!
هتشوفوا دلعه و دلالة ** ويزوّد حبه و غلاوته
حبيبي جماله دا شيء نادر ** وملوهشي في حلاوته مثيل
لو بصّه من رمش عيونه ** القلب بسرعة لقلبه يميل

....

حبيبي الحلو الأمور ** مين زِيَّه ف طبيبته وحلاوته ؟!
لو حد ياناس زيه قولولي ** دا البدر يقوم كدا من جاره
دا الضحكة بالسن اللولي ** بتلهب للقلب ف ناره

...

حبيبي الحلو الأمور ** مين زِيَّه ف طبيبته وحلاوته ؟!
الناس غيرانة دا شئ عادي ** طاب تعمل إيه ؟!
انا خايقة كتير من حسادي ** اسم الله عليه
حبيبي الحلو الأمور ** مين زِيَّه ف طبيبته وحلاوته ؟!
هتشوفوا دلعه و دلالة ** ويزوّد حبه و غلاوته

دنيا ماشية بينا

يا دنيا ماشية بينا ** ف بحور من غير سفينة
بقلوب متجرحه ** ودموع ف عيون حزينة
يا دنيا خفى حبة ** دا كفاية القلب عبى
والدمعة بنداريها ** مش راضية تستخبي
طاب ليه القسوة ديه؟! ** لو نضحك تجرحينا
يا دنيا ماشية بينا ** ف بحور من غير سفينة
يا دنيا ليه كده ** ع الحزن مأكدة
طاب ليه دايمًا تعاندى ** وعلينا منكدة
دا احنا الطيبة وجمالها ** ولا هوالعيب دا فينا
يا دنيا ماشية بينا ** ف بحور من غير سفينة
يا ما دوبنا م الأسى ** والضحكة بتتنسى
واقفين على شط فرحك ** ولا مركب يوم رسا
ليه نلقى القسوة منك؟! ** وف حزنك بتنادينا
يا دنيا ماشية بينا ** ف بحور من غير سفينة
بقلوب متجرحه ** ودموع ف عيون حزينة

شهر الصوم

بالزينة وبهجة وترحيب ** يا رزق جاى م السما للأرض
دا العطر يفوح والكون ده رحيب ** رمضان يا صومك رحمة وفرض

..

وبنستناك م السنة للسنة ** يا ليالى سمحة وكدا هالة
يا شهر الصوم و الخير والهنا ** والرحمة فيضها بيتجلى

..

ضى الفوانيس يفرح ويقيد ** باللمة الحلوة بنتجمّع
والنفس هتصفى بتقوى تزيد ** وعيون من الخشية تدمّع

...

صايم فبيفطر على بلحات ** والعبد بيكرم لو شاكر
والقدر ليلة وفيها نفحات ** يا حظ مؤمن لو ذاكر

..

بالزينة وبهجة وبالترحيب ** يا رزق وجاى م السما للأرض
دا العطر يفوح والكون دا رحيب ** رمضان يا صومك رحمة وفرض

خف الحلاوة

خف الحلاوة حبيبي رَوِّق ** دا النظره ف عيونك تفوَّق

خف الحلاوه حبة حبة ** دا انا قلبي دايب م المحبه

لَمَّا تبعد لحظه عنى ** ألقى نار ف القلب هابَه

...

خف الحلاوة حبيبي رَوِّق ** دا النظره ف عيونك تفوَّق

لَمَّا يلمع نور عيونك ** عيني بارده الله يصونك

الجمال دا زيَّه فين؟! ** دا النجوم تاهت ف كونك

....

خف الحلاوة حبيبي رَوِّق ** دا النظره ف عيونك تفوَّق

القمر جنبك دا إيه ** لو مره يوم بصيت عليه

دا اللى شاف ضحكة جمالك ** عمره ما يصدق عينيه

خف الحلاوة حبيبي رَوِّق ** دا النظره ف عيونك تفوَّق

وانتهينا

وانتهينا يا حبيبي ** وايه يفيد لنا العتاب؟!
وكل واحد راح في سكة ** وحبل ود القلب داب
ياما كنت أستنى فيك ** وانتى جايه هناك بعيد
ودق قلبي كان يقولك ** كل مرة كلام جديد
وانتهينا يا حبيبي ** وايه يفيد لنا العتاب؟!
وكل واحد راح في سكة ** وحبل ود القلب داب
كل حته مشينا فيها ** قلبي مش قادر يروحها
وكل كلمة بافكرها ** روي تتفتح جروحها
وانتهينا يا حبيبي ** وايه يفيد لنا العتاب؟!
وكل واحد راح في سكة ** وحبل ود القلب داب
اللي كان عاشق ومخلص ** ينسى حبه.. مستحيل
كل ذكرى عليه تعدي ** تلقى دمع عينيه يسيل
وانتهينا يا حبيبي ** وايه يفيد لنا العتاب؟!
وكل واحد راح في سكة ** وحبل ود القلب داب

ألف سلامة

ألف سلامة عليك يا حبيبنا ** أنت أكيد محسود
أصلك قلبك حلو وطيب ** ولا فيكشى حاجه بتتعيّب
وبتفرح من فرح حبايبك ** ومعاك قلب ودود
تمرض حبيبنا بنحزن عليك ** وتتعب قلوبنا وتشتاق إليك
سلامتك وترجع إلينا بسلامه ** وضحاكية صافية بتملا عينيك
ألف سلامة عليك يا حبيبنا ** أنت أكيد محسود
أصلك إنك راجل طيب . ** ولا فيكشى حاجه بتتعيّب
وبتفرح من فرح حبايبك ** ومعاك قلب ودود
غياك حبيبنا يبين غلاوتك ** وكله بيسأل ويبعت سلام
وندعى حبيبى تيجينا بسلامتك ** وترجع بصحه وعافيه و تمام
ألف سلامة عليك يا حبيبنا ** أنت أكيد محسود
أصلك قلبك راجل طيب ** ولا فيكشى حاجه بتتعيّب
وبتفرح من فرح حبايبك ** ومعاك قلب ودود

يا ابو العريس

يا ابو العريس افرح و غنّي ** والحيطان رنقش وحنّي
كل أهلك جات تهنّي ** يا عمدة سبيك م العزول
يا ابو العريس افرح و غنّي ** وارقص على دق الطبول
طوف وسلم ع الحبايب ** منهم الحاضر وغايب
أحلى رقصة مع النسايب ** والضيوف فرحة وقبول
يا ابو العريس افرح و غنّي ** وارقص على دق الطبول
تعب العريس نقّي ودور ** بص يا ابني وشوف وصور
زي القمر والبدر نور ** واللي يصبر راح ينول
يا ابو العريس افرح و غنّي ** وارقص على دق الطبول
يا ابو العريس الليلة عيدك ** وزّع الشربات بإيدك
كل الحبايب دي تريدك ** طاب والعوازل إيه تقول؟!
يا ابو العريس افرح و غنّي ** وارقص على دق الطبول
كلنا جايين نبارك ** فرحتك ومعاك نشارك
واللي فاهم واللي دارك ** يعرفك يا ابن الأصول
يا ابو العريس افرح و غنّي ** وارقص على دق الطبول

نونو صغیر

أنا فعلاً نونو وصغیر ** لكن و بتفکیری کبیر

لو شوفت ذکائی هتتحیر ** وتقدم صفقة وتقدير

أنا باغسل بالفرشة سنائی ** دایماً ف الصبح وباللیل

ولا رایح من سوسة أعانی ** ولا شدش للقطه الدلیل

أنا فعلاً نونو وصغیر ** لكن و بتفکیری کبیر

لو شوفت ذکائی هتتحیر ** وتقدم صفقة وتقدير

مش ممکن أشخبط ع الحیطه ** وبحافظ على كل صلاتی

ف الفصل انا مش باعمل زیطه ** ولا یمكن ازعل زملائی

أنا فعلاً نونو وصغیر ** لكن و بتفکیری کبیر

لو شوفت ذکائی هتتحیر ** وتقدم صفقة وتقدير

فرحة دنيتي

مطرب –

دا الليلة فرحة دنيتي ** والقلب دقاته بهواك
هنعيش حياتنا بحبنا ** والعمر كله هاكون معاك
يا أغلى نعمة م السما ** دا حبيبتي أجمل من ملاك

مطربة –

يا حبيبى قلبى بيعشقك ** وانا فرحتى من غير حدود
انت اللى بس شغلتنى ** والبوسة تنده ع الخدود
هنعيش حياتنا لبعضنا ** والدنيا نفرشها بورود

مطرب –

دا انا كنت مستنى الليلادى ** بلهفة وبشوق وانتظار
ولقيت حبيبتي بين ايديا ** شمس بتنور نهار
والعمر وياها ابتدا ** والفرحة تحالنا بعمار

مطربة –

دا الليلة فرحة دنيتي ** والقلب دقاته بهواك
هنعيش حياتنا بحبنا ** والعمر كله هاكون معاك

يا أغلى نعمة م السما ** دا حبيبي أجمل من ملاك

مطرب –

أنا النهاردة مش مصدق ** الهنا اللي انا قلبي فيه

وان حبيبتي جنب منى ** دا حلم عمرى انا عشت ليه

النهاردة لحن حبي ** بين ايديكى بتعزفيه

مطربة –

يا حبيبي انا برضه زيّك ** كنت عايشه استنى فيك

لمّا شوفتك قلبي دق ** وروحي تحلم بتناديك

النهاردة أنا جنب منك ** كل حبي وهبته ليك

الواد النونو

أنا نونو لكن متعلم ** وبيظهر ف سلوكى علامى
وبارد تحية وباسلم ** ولا عمرى بازعق فى كلامى
ولا عمرى باقصر فى الواجب ** ولهدفى أنا راسم خطة
ف الفصل لاستاذى انا عاجب ** ولا عمرى بضايق ف القطة
أنا نونو لكن متعلم ** وبيظهر ف سلوكى علامى
وبارد تحية وباسلم ** ولا عمرى بازعق فى كلامى
أنا بامشى دايماً ف الخير ** والوش بشوش ومتبسّم
ولا باطمع فى حاجات الغير ** دا الرزق بتاعنا دا متقسّم
أنا نونو لكن متعلم ** وبيظهر ف سلوكى علامى
وبارد تحية وباسلم ** ولا عمرى بازعق فى كلامى

سوهاج

سوهاج يا شمس ف قلب صعيد ** نهتف نغنى نقول ونعيد
أرض المحبة طهطا وساقلته ** وقلوب طيابة و الخير يزيد
متحف آثارنا فخر السياحة ** طبع الشهامة والباع شديد
أخميم حريرها توب الحضارة ** أبطال جهينة رمز الشهيد
سوهاج يا شمس ف قلب صعيد ** نهتف نغنى نقول ونعيد
سوهاج يا عطر تاريخ بيفوح ** بابها لضييفاها يا ناس مفتوح
يا دار سلام وكرم وشجاعة ** والأصل تلقى منين ما تروح
منشأة مراغة عسرات كمان ** واسأل تبان بلينا بوضوح
جرجا وطماوى والنور سماوى ** لمسة تراك تشفى الجروح
سوهاج يا شمس ف قلب صعيد ** نهتف نغنى نقول ونعيد
والشيخ رفاة دا فخر على ** ونجوم سوهاجنا فى الكون تلالى
ابيدوس ومينا و النيل راوينا ** سوهاج يا عشقك ف القلب غالى
لو جيت تزورنا هتقول لنفسك ** ناسها قرايبي عمى يا خالى
ونسيم هواها عطر غيطانها ** رنقش حيطانها تزويق جمالى
سوهاج حبيبتى ساكن ف حضنك ** وانتى اللى ساكنة روحى و خيالى
سوهاج يا شمس ف قلب صعيد ** نهتف نغنى نقول ونعيد

اوعى تصدق

اوعى تصدق انى ف بُعدك ** يقدر قلبى ف يوم يتهنى
شوفت عذاب حرمان من بُعدك ** عشت احلم بالقرب اتمنى
لو توعدننى انك يوم راجع ** هافضل عمرى بحاله استنى
مهما بدارى كثير وباخبنى ** وباقول عادى بعاده ما أثّر
بالقى الشوق يملا ويبعبى ** وجوا العين باين متفسّر
واعمل انى كمان ناسياه ** وقلبى يببكى عليه يتحسّر
اوعى تصدق انى ف بُعدك ** يقدر قلبى ف يوم يتهنى
شوفت عذاب حرمان من بُعدك ** عشت احلم بالقرب اتمنى
لو توعدننى انك يوم راجع ** هافضل عمرى بحاله استنى

محمد نبينا

محمد الهادى نبينا ** جانا من مكة ومدينة
جانا بالحب وسلام ** كله رحمة وعطف لينا
اسمه كان مسك الختام ** وصفه كان صادق أمين
كانت الدنيا ف عتام ** جانا بالنور المبين
محمد الهادى نبينا ** جانا من مكة ومدينة
جانا بالحب وسلام ** كله رحمة وعطف لينا
بالصلاة دائماً عليه ** الحياة تصفى وتروق
النفوس تشتاق إليه ** زى ليل يعشق شروق
محمد الهادى نبينا ** جانا من مكة ومدينة
كل ما نمشى ف مداه ** بدر بينور دروب
لما نتبع هداه ** ينصلح حال القلوب
محمد الهادى نبينا ** جانا من مكة ومدينة
جانا بالحب وسلام ** كله رحمة وعطف لينا

سامحینی یا اُمی

سامحینی یا اُمی سامحینی ** دا انا ربی علیکی موصینی

وباقصرَ دایمًا ف حقوقك ** ولا عمرک مرّه بتنسینی

لو شوفتی عیونی الحیرانه ** قلبك يتقطع م الهم

وکتیر وباشوفک سرحانه ** ولا بسأل حتی ولا اهتم

سامحینی یا اُمی سامحینی ** دا انا ربی علیکی موصینی

وباقصرَ دایمًا ف حقوقك ** ولا عمرک مرّه بتنسینی

أنا كنت صغيرَ أشاورلك ** ولاحد فاهمني كان غيرك

أنا سر وجودی من ضلك ** ولا أقدر اوفيلك خيرك

سامحینی یا اُمی سامحینی ** دا انا ربی علیکی موصینی

وباقصرَ دایمًا ف حقوقك ** ولا عمرک مرّه بتنسینی

بتدلع دایمًا علی حسك ** وكأني صغيرَ ف اللفه

من عشمی یا اُمی أنا فيكي ** باجرى على حضنك وادفی

سامحینی یا اُمی سامحینی ** دا انا ربی علیکی موصینی

وباقصرَ دایمًا ف حقوقك ** ولا عمرک مرّه بتنسینی

سامحینی یا اُمی سامحینی

عجوز بيعاكس

وعجوز متكعب بتعاكس ** وعامللى روميو وحبوب
مغرور ومحدث كدا عاجبك ** وكمان بتلاعب ف حواجبك
عامل فرفور واد يا حليوة ** قال يعنى ف حبك راح أدوب
وعجوز متكعب بتعاكس ** وعامللى روميو وحبوب
قال جايب السمكة من ديلها ** وجايلى هدية ف منديلها
والصبغة بتلمع على شعرك ...وماسكلى وردة ودبدوب
وعجوز متكعب بتعاكس ** وعامللى روميو وحبوب
مغرور ومحدث كدا عاجبك ** وكمان بتلاعب ف حواجبك
يغمز بعيونك وتسبل ** قال يعنى ف حبك راح أدوب
وعجوز متكعب متهزأ ** كروهات ولبانه ومتحزأ
نفسك مقطوع وبتشدوا ** والناس تندهلك أ يا جدوا
بتشوف بنوته تروح قايم ** تعمل حركات يا خفيف هايم
قال يعنى الواد المتروشن ** تلبس نضارتك مقلوب
وعجوز متكعب بتعاكس ** وعامللى روميو وحبوب
مغرور ومحدث كدا عاجبك ** وكمان بتلاعب ف حواجبك
عامل فرفور واد يا حليوة ** قال يعنى ف حبك راح أدوب

راجع ليه؟!

راجع تانى بتسأل ليه ؟! ** هيه حكاية حبك ايه
قلبي كان مخلص فى غرامك ** وانت كنت بتقسى عليه

راجع تانى بتسأل ليه ؟!

راجع تانى بتسأل عنى ** طاب مين قالك أنا مستنى؟!
بعد ما رُوح تبح لغيرى ** قلبي انسيك وعاش متهنى
بعدما قلبك راح لبعيد ** سابنى ف شوق وعذابى وحيد

راجع تانى بتسأل ليه ؟!

بعد ما قلبك باعنى وخونت ** ولقيت نفسى معاك انا هنت
روح دأويت انا كل جروحي ** وابقيت انت مجرد ذكرى
انت مجرد ماضى وكنت ** راجع تانى بتسأل ليه؟!

متسبّلش عینیک

مش غریبه دی عليك ** تیجی وتسبّل عینیک

مهما تحلف میت یمین ** قلبی مش مرتاح الیک

لو فکرت ف مرة آسیبک ** مین غیر قلبی هیبقی حبیک

یاما زرعت ف قلبی جروح ** وکنت بقولک انی نصیبک

مهما هاتبعد ولّا تروح ** بکره اکید الشوق هیجیبک

مش غریبه دی عليك ** تیجی وتسبّل عینیک

مهما تحلف میت یمین ** قلبی مش مرتاح الیک

لما تفکر تبقی أنانی ** وقلبك یصبح قاسی بییع

مش هاسمحلک ترجع تانی ** تدبح ورده ف عمر ربیع

دا انت بجد حقیقی أنانی ** خلّیت عمر حیاتنا یضیع

مش غریبه دی عليك ** تیجی وتسبّل عینیک

مهما تحلف میت یمین ** قلبی مش مرتاح الیک

أغنية الغربة

عايز تعرف ايه احساسى ** وانا ف الغربة بعيد عن ناسى
آه م الحرقه آه م الفرقه ** نار وعذاب وشوق ومآسى
زى الطفل خدوه من أمه ** زى التايه جوه الزحمه
نفسه ف حضن أمان بيضمه ** الى يغيب عن أهله وناسه
كل هموم الدنيا تغمه ** جمر البعد بيكوى وقاسى
لمّا حنين الشوق يندهلك ** ولّا انين الذكري لأهلك
لمّا بتسهر وانت وحيد ** عمرك كله قضيته بعيد
عمر المال ما هتشبع منه ** ابنى حتى ما باعرف سنه
وتقول كنز معاي وتظنه ** باشرب مر الحزن ف كاسى
عايز تعرف ايه احساسى ** وانا ف الغربة بعيد عن ناسى
اسأل واحد سافر جرّب ** اسأل واحد تاه عن أهله
يوم واتغرّب ** اسأل واحد كان عطشان
جوّ الصحرا شاف الميه ** بعيد تتسرّب
اسأل واحد تاه ف الموج ** مش لاقى مراسى
عايز تعرف ايه احساسى ** وانا ف الغربة بعيد عن ناسى
آه م الحرقه آه م الفرقه ** نار وعذاب وشوق ومآسى

ادعيلي يا أمّه

دعاكى يا أمّا سر كبير ** ادعيلي عند الصلا والصوم

أنا مهما أكبر ولا أكون ** قلبك يا أمى شايلى همى

حبك دا سر الله ف الكون ** حبك بيجرى أنا ف دمی

لو قلت آه أنا حتى ف حلم ** قلبك علياً أنا يسمّى

دعاكى يا أمّا سر كبير ** ادعيلي عند الصلا والصوم

لو كنت مرّه ف يوم تعبان ** عينك ما تعرف طعم النوم

لو مرّه حزن عليا بيان ** تصبح معاكى الدنيا هموم

لو غبت مرة عن عينكى ** قلبك ما يهدا طول اليوم

دعاكى يا أمّا سر كبير ** ادعيلي عند الصلا والصوم

دايما بتدى ولا بتمنى ** والدنيا واخدانا بعيدك

واحنا بنقسى وبتحنّى ** ولا حتى نسأل يوم عيدك

قلبك بينسى وبيسامح ** لمّا بنيجى نبوس إيدك

دعاكى يا أمّا سر كبير ** ادعيلي عند الصلا والصوم

مالك يا دنيا

يا دنيا مالك كدا بينا ؟! ** يا دنيا مالك بتعاندى ؟
دا احنا اللى فينا مكفيننا ** خلصت دموعى اللى انا عندى
تايهين وفيكى بنتغرب ** والفرحة مالها بتتهرب ؟!
بنروح ونبعد عن همك ** نلاقى الحزن بيقرب
يا دنيا مالك كدا بينا ؟! ** يا دنيا مالك بتعاندى ؟!
دا احنا اللى فينا مكفيننا ** خلصت دموعى اللى انا عندى
يا دنيا ليه قلبك قاسى ؟! ** واخدانا موجك ف ماسى
لا راضى ينده على برك ** ولا حتى يهدا فى مراسى
يا دنيا مالك كدا بينا ؟! ** يا دنيا مالك بتعاندى ؟!
دا احنا اللى فينا مكفيننا ** خلصت دموعى اللى انا عندى
يا دنيا لافه كدا بينا ** حبلك بحزنك دا طاوينا
يا دوبك أمسح ف دموعى ** تعتر فى همك خطاونا
يا دنيا مالك كدا بينا ؟! ** يا دنيا مالك بتعاندى ؟!
دا احنا اللى فينا مكفيننا ** خلصت دموعى اللى انا عندى

شعب واحد

ازای شمس الحب تغیب؟! ** رمز الوحدة هلال صلیب
شوف الجامع جنبه كنيسة ** طوبة طوبة بشكل عجیب
احنا الشعب نسیج متماسك ** شارب كاس الحب نصیب
أحمد لو ینده هیلاقی ** جرجس جاله بسرعه مجیب
جرجس لو یصرخ م الشوكه ** یلقى محمد جنبه قریب
ازای شمس الحب تغیب؟! ** رمز الوحدة هلال صلیب
اسأل كل تاریخ هیقولك ** مصر حامیها المولى رقیب
مركب ماشیه لبر أمان ** موسى محمد عیسی حبیب
شوف الحب بألوان ثابتہ ** لو فنان أو كنت أدیب
لمّا الروح تتنفس حب ** یبقى إزای یفتنها غریب؟!
ازای شمس الحب تغیب؟! ** رمز الوحدة هلال صلیب

عيد الميلاد

قيّدوا الشمع وحطّوا ورود ** رشوا الملح ف وش حسود

وارقصوا بالفرح غنوا ** واعزّفوا الألحان بعود

هاتوا تورته مع الهدية ** وزعوا الشربات عيديه

عيد ميلاد أغلى الحبايب ** ودى مناسبة ومش عاديه

عيد ميلادك يا حبيبنا ** لحظة حلوة فى الوجود

جددت جوانا فرحة ** ألف عام بالخير تعود

قيّدوا الشمع وحطّوا ورود ** رشوا الملح ف وش حسود

وارقصوا بالفرح غنوا ** واعزّفوا الألحان بعود

عيد ميلادك أحلى لمة ** فى القلوب وضعك دا على

من حسود القلب سمى ** ربنا يصونك يا غالى

لما جيت الكون جنابك ** كلنا اتشرفنا بيبك

ما انت قلبك أصله طيب ** وكل خير جواك ماليك

قيّدوا الشمع وحطّوا ورود ** رشوا الملح ف وش حسود

وارقصوا بالفرح غنوا ** واعزّفوا الألحان بعود

عاشق لجيشنا

قولوا عليا منافق ** قولوا وانا موافق
لجيشنا وبلدنا ياناس ** عاشق ومتوافق
لو جيشنا فى يوم انفك ** بينا العدا تحتك
نصبح يا ناس لاجنين ** لمّا الوطن يندك
جيشنا يارب راعيه ** حامى الوطن وواعيه
مصرى ما فيه أطيف ** هدفه السلام وداعيه

....

بلدان يضيع جيشها ** ما تلاقى يوم عيشها
هاتتوه وتتفرق ** منتوف جناح ريشها
جيشنا الأمان والدرع ** حامى الجذور والفرع
مركب تتوه تغرق ** لوسابت فى يوم الشرع

....

جيشنا الأمان والضلّ ** حامى الوطن ما يكلّ
بلدان بلا جيشها ** ليها العدا هتذلّ
قولوا عليا منافق ** قولوا وانا موافق
لجيشنا وبلدنا ياناس ** عاشق ومتوافق

سكة النسيان

وف سكة النسيان ** لفت بنا الدائرة
تاهت خطاوى الحب ** وقلوبنا اهي حائرة
وف سكة النسيان ** لفت بنا الدائرة
يا قلب يا رحال ** مالك بتعشق ليه؟!
تبعد تروح وتغيب ** حبك بتبكي عليه
مهما فى يوم تنساه ** شوقك يحن إليه
يا قلب يا رحال ** مالك بتعشق ليه
وف سكة النسيان ** لفت بنا الدائرة
تاهت خطاوى الحب ** وقلوبنا اهي حائرة
وف سكة النسيان ** لفت بنا الدائرة
يا قلبى يا طيب ** إنت اللى زيك فين؟!
دا للى هويته زمان ** بكاك بدمع العين
واللى عملته خير ** مالك بتلقاه شين
يا قلبى يا طيب ** أنت اللى زيك فين?!
وف سكة النسيان ** لفت بنا الدائرة
تاهت خطاوى الحب ** وقلوبنا اهي حائرة

وافترقنا

وافترقنا يا حبيبي ** وكل واحد راح لحاله
وكل واحد فينا ودّع ** اللى سمعه واللى قاله
ومين بيعشق يا حبيبي ** والفراق يخطر بباله؟!
وافترقنا يا حبيبي ** وكل واحد فينا راح
وكل واحد فينا فكّر ** انه ف البعد استراح
دا اللى فارق يا حبيبي ** عاش لوحده فى الجراح
وافترقنا يا حبيبي ** وذكرياتنا ليه تهون؟!
اللى كان مخلص لحبه ** يجى مرة ف يوم يخون?!
وافترقنا واللى بينّا ** مستحيل يرجع يكون
وافترقنا يا حبيبي ** وكل واحد راح لحاله
وكل واحد فينا ودّع ** اللى سمعه واللى قاله
ومين بيعشق يا حبيبي ** والفراق يخطر بباله

امتى نفرح

امتى نلاقى الفرحة نصيبنا ** وامتى الدنيا تروق؟!
امتى الدمعه تروح وتسيبنا؟! ** ومن أحزاننا نفوق؟!
ليه ماشيين بالزور وخداع؟! ** وألف قناع ع الوش؟!
ليه أحلامنا يا ناس فى ضياع ** وماشيه حياتنا بغش؟!
ساعه تاخذنا الدنيا شمال ** وساعه تجيبنا يمين
ليه مش لاقيين راحة البال ** وليه القلب حزين؟!
امتى نلاقى الفرحة نصيبنا ** وامتى الدنيا تروق؟!
امتى الدمعه تروح وتسيبنا؟! ** ومن أحزاننا نفوق؟!
دوبنا يا ناس من كتر الهمّ ** وكله صبح موجوع
امتى جراحنا يا ناس تتلم ** وننسى أنين ودموع
قاسين احنا على بعضينا ** محدش راحم حد
عشنا جراحنا ياناس ورضينا ** وقولنا سنين تتعد
كل ما نحلم يوم بالفرحه ** نلقى الحلم اتهد
كل ما نبني طريق لأملنا ** نلقى طريقنا اتسد
امتى نلاقى الفرحة نصيبنا ** وامتى الدنيا تروق؟!
امتى الدمعه تروح وتسيبنا؟! ** ومن أحزاننا نفوق?!

يا عريس الليلة

يا عريس الليلة ليلتك ** يالا قوم أرقص وغنى
دا الفرحة ف لمة عيلتك ** و حبايبك جايه تهنى
فرّحت قلوبنا معاك ** والسعد اهو ليك مستنى
يا عريس الليلة ليلتك ** يالا قوم أرقص وغنى

...

دى عروستك بدر منور ** ليها أهل وبنت أصول
سبحان خالق و مصوّر ** دى جمالها مش معقول
والحب خلاص جمّعكم ** واصبرت واديك بتنول
دى عروستك بدر منور ** ليها أهل وبنت أصول

....

يا عريس يا ابو ضحكة رايقة ** يا حلاوته يا ناس وجماله
دى عروسته حلوة وعايقة ** هتروّق قلبه وباله
دا عريسنا حظه ناداه ** وأمه يا ناس داعياله
يا عريس يا ابو ضحكة رايقة ** يا حلاوته يا ناس وجماله

تاج النصر

سته أكتوبر عيد الفرحة ** جيشك جابلك نصر مبين
حطم كل قيود النكسة ** رافع هامه وراس و جبين
جيشك غنى رافع صوته ** الله أكبر لحن رنين
خلا العالم كله هيعرف ** إن المصرى حقيقى دا مين
سته أكتوبر عيد الفرحة ** شد لشمسك أحلى نهار
ابنك ضحى بروحه عشانك ** جدد حلم معانا انه هار
خلا عدوك ياخذ عبرة ** قال دا المصرى ما يقبل عار
سته أكتوبر عيد الفرحة ** جابلك تاج وقمر وبدور
قالك غنى يا أحلى عروسة ** جاتلك سينا وجبل الطور
جات تغزلك توب امجادك ** دم شهيدك مسك عطور
أظهر جند الأرض معاكى ** بحر وجو حيتان و نسور
جيشك هب وخذلك تارك ** جابلك أحلى هدية عبور
حطم كل قواعد اللعبة ** دمر خط لجيش مغرور
خلاه يعرف إن ترابك ** يبقى لأى عدو قبور
سته أكتوبر عيد الفرحة ** جابلك تاج النصر بدور

كلام الناس

شق طريق ف السكه وعَدِّي ** وانسى كلام الناس
لو تتأخر يوم وتهْدِي ** حلمك راح ينداس
ارمي كلامهم من ورا ضهرك ** شوف مصلحتك فين
لو تسمع هاتموت من قهرك ** تبكي بدمع العين
مهما شافوك بتحاول تنجح ** ماهيتقالك زين
شق طريق ف السكه وعَدِّي ** وانسى كلام الناس
الحاسد منهم والغاير ** واللي يهدّ الحيل
مهما الغنوة بتاعتك هايّلة ** يبقى صهيل الخيل
شق طريق ف السكه وعَدِّي ** وانسى كلام الناس
لو تتأخر يوم وتهْدِي ** حلمك راح ينداس
فيه م الناس متحبش غيرها ** ف كل طموح بتهد
دى قلوب سودة و معدوم خيرها ** زى الشوك بتمد
كل ما حد يبص لفوق ** تاخده لتحت تشد
شق طريق ف السكه وعَدِّي ** وانسى كلام الناس
لو تتأخر يوم وتهْدِي ** حلمك راح ينداس

دباديبو

دبدوب ددبب دباديبو ** ابعء عن قلبى وسيبو
مين قالك إنك تعرف ** ولا تقدر تبقى حبيبو
ابعء عن قلبى وروح ** مش ناقصه معاى أنا حيره
وخلص بالسر بابوح ** ياما داب قلبى من الغيره
ومليته كتير بجروح ** لو ضاع ازاي هتجيبو
دبدوب ددبب دباديبو ** ابعء عن قلبى وسيبو
يا ما كنت بحايل فيك ** ولا مرة ناداك الشوق
والقلب اتعلق بيك ** مغرور وتبص لفوق
تزعل وكتير براضيك ** ودى حاجه مش بتعيبو
دبدوب ددبب دباديبو ** ابعء عن قلبى وسيبو
عرفت انك مكار ** مخدوع من خفة دمك
تمشى وتسيبنى احثار ** وعذابى عمره ماهمك
ازاي انا ليك هاختار ** وقلبك بانث ألاعيبو
دبدوب ددبب دباديبو ** ابعء عن قلبى وسيبو
مين قالك إنك تعرف ** ولا تقدر تبقى حبيبو

رَوَّق

رَوَّق يا حبيبي رَوَّق ** واشرب برواقه لمونك
وبلاش النظرة القاسيه ** تظهر وتبان ف عيونك
اشرب يا حبيبي ورَوَّق

أنا جايك طاير طير ** وگرامي بجد شاددني
ومشيت على عكس السير ** علشان عارفك مواعدني
ملهوف يا حبيبي أشوفك ** والقلب إليك متشوق
رَوَّق يا حبيبي رَوَّق

أنا عايزك تفضل هادي ** أنا عايزك تفضل كool
زعلك عندي ماهوش عادي ** زعلك خليه معقول
على نار مستنى أقابلك ** بالبس ف هدومي وأزوق
رَوَّق يا حبيبي رَوَّق

أنا صاحي جاهز من بدرى ** خايف لأحسن أتأخر
وماشى بسرعه وباجرى ** ماعايشي الريح متسخر
والضحكة ياناس في حدودك ** تنعش عيان وتفوق
رَوَّق يا حبيبي رَوَّق ** واشرب برواقه لمونك

هلت ليالي الخير

شهر الصيام نادى ** ربك كريم هادى
هلت ليالى الخير ** والرحمة بتنادى
وليلة القدر تتجلى ** يفوز العبد لو صلى
يا بخته لمّا بيزكى ** يلاقى حياته تتحلى
شهر الصيام نادى ** ربك كريم هادى
هلت ليالى الخير ** والرحمة بتنادى
ضى الفانوس بيقيد ** رزق الفقير بيزيد
قرءان مع التراويح ** والكون بنوره سعيد
شهر الصيام نادى ** ربك كريم هادى
هلت ليالى الخير ** والرحمة بتنادى
نده الأذان سمّع ** وبندعى وندمّع
وموائد الرحمن ** بالخُب بتجمّع
شهر الصيام نادى ** ربك كريم هادى
هلت ليالى الخير ** والرحمة بتنادى

نهاية حبنا

بعد سنين من حبك ليًا ** وخط الفرح اللى رسمناه
لعبت بيكى الدنيا وبيا ** وضاع الحلم اللى حلمناه
عمر البعد ما كان بخاطرنا ** ولا كان يخطر يوم على بال
ليه م الحب نعيش مخاطرنا؟! ** ويقطع لينا عذول ف حبال
بعد سنين من حبك ليًا ** وخط الفرح اللى رسمناه
لعبت بيكى الدنيا وبيا ** وضاع الحلم اللى احلمناه
حُب قلوبنا الطاهر نادر ** حُب العمر دا مين ينساه؟!
ليه بيصده الريح الهادر؟! ** ليه بنهايته تكون مأساة؟!
بعد سنين من حبك ليًا ** وخط الفرح اللى رسمناه
لعبت بيكى الدنيا وبيا ** وضاع الحلم اللى احلمناه
أجمل حب عاشوه حبيبين ** قلب و روح من بعض تقرب
دا اللى يفرّق بين قلبين ** خليه لحظة يارب يجرب
بعد سنين من حبك ليًا ** وخط الفرح اللى رسمناه
لعبت بيكى الدنيا وبيا ** وضاع الحلم اللى احلمناه

التار

ليه القتل وليه التار؟! ** ليه بنخلي حياتنا دمار؟!

سكته ضلمة ما فيها نهاية ** كل النار تبدأ بشرار

ليه بنخلي حياتنا عذاب؟! ..ليه بيرخصوا فينا الدم؟!

لما بإيدك تاخذ حقك... تدخل دايرة بنفس الغم

ليه القتل وليه التار؟! ** ليه بنخلي حياتنا دمار؟!

سكته ضلمة ما فيها نهاية ** كل النار تبدأ بشرار

ليه بتقتل نفس بريئة؟! ...ليك السجن أديه مستنى

ليه نفسك ع الشر جريئة؟! ...مين يقتل ويعيش متهنى؟!

ليه القتل وليه التار؟! ** ليه بنخلي حياتنا دمار؟!

سكته ضلمة ما فيها نهاية ** كل النار تبدأ بشرار

ليه الشر يا ناس يتجدد؟! ..بكره عليك الدايرة تدور

عمرك كله تعيش متهدد... كل الزرعة معاك هتبور

ليه القتل وليه التار؟! ** ياله نعيش الدنيا عمار

ياله نسامح بعض ونصفح ** نلقى الحب طرح أشجار

عريس م الفرحة

عريس م الفرحة طاير ** عارفين ياناس دا ليه؟!
بيدّى حماته بوسه ** ويبجرى يبوس حماه
ياناس شوفوا العروسه ** دا قمر نور سماه
وعواذله ياناس مفروسه ** دا عريسنا الحلو البيه

..

وعريس م الفرحة طاير ** عارفين ياناس دا ليه?!
دا سعه ليه بشاير ** والحظ يا ناس ندهله
وشه كالبدر الناير ** والليلة مفرّح أهله
مهما الحسود دا غاير ** خطوا الملح ف عينية

...

عريس م الفرحة طاير ** عارفين ياناس دا ليه?!
عروسته الحلوه جاته ** وعنه كات بعيد
رايحه تغير حياته ** ويّاها يعيش سعيد
ويشوف أولاده بناته ** ألفين مبروك عليه
عريس م الفرحة طاير ** عارفين ياناس دا ليه?!

مصرنا تنده

مصرنا تنده تنادى ** ع السواعد والأيدى
و العرق فوق الجبين ** قوموا يالا يا مخلصين
بالعمل ويا الكفاح ** تجنبوا أزهار النجاح
نلقى كل الخير يعم ** وبكره يتحقق مرادى
ده النحلة لو تعرف كسل ** ماكنتشى يوم جابت عسل
صورة حلوة وفيها عبرة ** بالعزيمة علام وخبرة
نلقى لون الرمل أخضر ** بين إيديكم ورد نادى
اللى بانى ف السكن ** واللى واقفين ع الممكن
واللى بيعلم عقول ** دا اللى يصبر راح ينول
بصوا شوفوا دولا مين ** مصر قالت دوول ولادى
مصر عايزه يا ناس جهودنا ** كلنا صاينين عهدنا
نبنى قصر المجد تاج ** بالعمل ويا النتاج
نغزل الفرحة بإيدينا ** واسألوا الأهرام ووادى
مصرنا تنده تنادى ** ع السواعد والأيدى

زى ما انت

زى ما انت ف كل حاجة ** لسه قاعد فيك عنادك
الغرور ويا السذاجة ** مش مغير فيك بعادك
كنت حاسة لما ترجع ** عن كل غلطة هاتعتذر
بس جيت ومُصر توجع ** قلبى اللى كانلك منتظر
زى ما أنت ف كل حاجة ** لسه قاعد فيك عنادك
الغرور ويا السذاجة ** مش مغير فيك بعادك
لسه برضه الغدر فيك ** ايه اللى مال يوم واتعدل؟!
دا الخداع طبع وماليك ** وليك ستار حبى انسدل
زى ما انت ف كل حاجة ** لسه قاعد فيك عنادك
الغرور ويا السذاجة ** مش مغير فيك بعادك
أسفة ع العمر اللى راح ** ف انتظار عصفور مسافر
لما يرجعللى بجراح ** ناسى عشه وقلبه نافر
زى ما انت ف كل حاجة ** لسه قاعد فيك عنادك
الغرور ويا السذاجة ** مش مغير فيك بعادك

مالك حبيبي

يا حبيبي مالك متغير ؟! ** والضحكة بتاعتك مش هيه

دا انا قلبي عليك بقى متحير ** وظنوني بتلعب كدا بيه

طاب ايه يا حبيبي اللي جراك ؟!

دا انا عقلى بيجيب ويودى ** سرحانة ودايمًا ملهيه

يا حبيبي مالك متغير ؟! ** والضحكة بتاعتك مش هيه

ياما كنت ف ليل تسأل عنى ** والصبح كمان

وتقول مشتاقك وباغنى ** وأنا عاطية أمان

اتاريك بتخدر أعصابى ** وتقول يا زمان

يا حبيبي مالك متغير ؟! ** والضحكة بتاعتك مش هيه

وأنا قلبي عليك بقى متحير ** وظنوني بتلعب كده بيا

دا الغدر بتاعتك بقى باين ** ف العين مكشوف

والحب معنا صبح هاین ** وكثير هنشوف

فخلاص انا سيبتك وبراحتك

ياما ناس حلوين أكثر منك ** واقفالى صفوف

يا حبيبي مالك متغير ؟! ** والضحكة بتاعتك مش هيه

وأنا قلبي عليك بقى متحير ** وظنوني بتلعب كدا بيا.

نار هجرک

قلبی لیکی مد ایده ** وانتی قاسیه کتیر علیه

یوم لقای ببقی عیده ** ویحسب التقصیر علیه

عمره ما فکر یخونک ** کل همه عاش یصونک

کان بیتحمل جنونک ** ویحبس الدمع ف عینیه

قلبی لیکی هام وعاشق ** وف هواکی راح غریق

نظرتک دی سهم راشق ** حزن شوقک فیه حریق

نفسه یلقی حنان فی لمسک ** نفسه یسمع مره همسک

لما بیفکر فی أمسک ** خطوته تنسی الطریق

قلبی شاری ولیه تبیع؟! ** وف العذاب دایماً تسبیه

الورود تعشق ربیع ** واللی مخلص ایه یعبیه؟!

نفسه کان یحلم معاک ** یکتب الغنوه ف هواک

دا اللی یشرب من دواک ** یلقی هجرانک نصیبه

مين علمك

مين بيعلم قلبك يقسى؟! ** و مين خلاك كدا تبقى أنانى
ليه بتسافر تبعد تنسى ** وتسبب قلبى ف حيرة يعانى؟!
مين يا حبيبى بياخدك منى ** وانت ف روحى و قلبى ساكنى
مهما بتهجر برضه شاريك ** شايلك جوا العين والننى

...

ليه العشرة عليك بتهون ** ليه باخلصلك وانت تخون
اوعى تفكر لما تسببنى ** انى هتوه بعديك ف الكون
دا انت هتبقى مجرد ذكرى ** صورتك عندى خيال وظنون
مين بيعلم قلبك يقسى؟! ** و مين خلاك كدا تبقى أنانى
ليه بتسافر تبعد تنسى ** وتسبب قلبى ف حيرة يعانى?!

بكره تعرف

لَسَّه قلبك برضه قاسى ** ولسَّه جاى بتبيع كلام
بعد حبى اللى انت خنته ** جاى تجدد لى الألام
بعد عمرى اللى انت خدته ** جاى تقول نبدأ سلام؟!

...

لَسَّه قلبك برضه قاسى ** دا أنت غدرك شئ فظيع
قلبى مش ممكن يسامحك ** ألف مره تخون.. تببيع
انخدعت أنا من ملامحك ** دا اللى يمشى وراك يضيع

...

لَسَّه قلبك برضه قاسى ** وقلبى كان يدك أمان
ياما عشت معاك مآسى ** وحبى كان يسقيك حنان
بكره تعرف طعم كاسى ** مهما طال بيك الزمان



أغلى الناس

كل الناس انا عندي ف كفة ** و كفة حبك يا مه تميل
دا انا جو البطن دي متخلق ** باكل من قوتك واتغذى
وف حبل حشاكى انا متعلق ** ولا قلتي انا منك بتأذى
وتدلى تشيلي فى اللفة ** نايم وف حضنك بتدفا
والعمر بتاعك خدناه ** وبندى وتقولى قليل
انا مهما اديتك ماهاوقى ** ولا كفى طول عمرى جميل
عايش على حسك بتدلع ** شايلانى ف عينك و الننى
جمرايه فيكى و بتولع ** لو وقعت شعرة ف يوم منى
لو باحزن قلبك يتعصر ** وف حقك دايمًا بنقصّر
انا مهما اديتك ماهاوقى ** ولا كفى طول عمرى جميل
وكافحتى يا امي وصبرتى ** والخير والرزق دا من سرى
لفت أيامك وكبرتى ** ومهما اديتك مها برك
دا الفرحة بتاعتك من فرحى ** وعيونك تصرخ من جرحى
انا مهما اديتك ماهاوقى ** ولا كفى طول عمرى جميل
كل الناس انا عندي ف كفة ** و كفة حبك يا مه تميل

خسرتك

مهما روحتى ولا غيبتى ** ومهما تبعدنا الأماكن
حبك انتى يا حبيبتى ** جوا قلبى لسه ساكن
رغم فراقك و الرحيل ** أنساكى لحظة ..مستحيل
أنتى أحلى ذكرى عندى ** وأنتى أحلى شئ جميل

..

ياما كنتى تراضى فيا ** وانا كنت عليكى قاسى
كنتى عايشه بس ليا ** وقلبى كان مشغول و ناسى

....

باعترف انى خسرتك ** لَمَّا سيبتك آه تروحي
كل ما أفكر فى سيرتك ** تنفتح جواى جروحي
مهما روحتى ولا غيبتى ** ومهما تبعدنا الأماكن
حبك انتى يا حبيبتى ** جوه قلبى لسه ساكن

خاين

أنت اللى قلبك كان طيب ** دلوقتي أصبح ليه قاسى؟!
اوعى فيك ظنى تخيب ** والفاك لأسمى كمان ناسى
أنت اللى حضنك كان دافى ** مليون محبه وخير وحنان
عايزنى ليه أفضل وافى؟! ** وأنت اللى قلبك سابنى وخان
أنا قلبى حبك أخلصك ** وكان يقول أنت نصيبه
غدرت ياما وبان أصلك ** جاي بعد إيه وحده تسيبيه
فاكر زمان كنت بسامحك ** أقول أكيد غصبين عنك
لكن صحيح شوفت ملامحك ** ولقيت شيطان طالع منك
خلاص يا قاسى بان غشك ** والمكر كان ساكن عينك
إياك يا غادر أشوف وشك ** وانسى اللى كان بينى وبينك

ارجع ليها

شايفاك رايح عنى بعيد ** سايب قلبى ف حيره وحيد

ليه جاي تسأل تانى عليها ** لو بتفكر ترجع ليها

بتمناك حظ سعيد

ارجع ليها حبيبى براحتك ** روح وهتلقى معاها نصيبك

عمرى حبيبى ف يوم ماجرحتك ** بس أن قلبى خلاص هايسيبك

بتمناك حظ سعيد

ارجع ليها وسيبك منى ** اوعى تفكر ترجع تانى

ارجع ليها وابعد عنى ** دا انت صحيح بجد أنانى

بتمناك حظ سعيد

ارجع ليها

شايفاك رايح عنى بعيد ** سايب قلبى ف حيره وحيد

ليه جاي تسأل تانى عليها ** لو بتفكر ترجع ليها

بتمناك حظ سعيد

ليه بتعانى

عارف ليه عايش بتعانى؟! ** علشان إنك شخص أنانى
شاييف نفسك دايمًا صح ** رافض تقبل رأى الثانى
ليه من كل نقاش خلافات؟! ** ليه بنبعد ف المسافات؟!
امتى قلوبنا ياناس تتصافى ** ويبقى ما بيننا شئ انسانى
عارف ليه عايش بتعانى؟! ** علشان إنك شخص أنانى
له عايشين فى زعيق وصداع؟! ** كله بيسخر م الأوضاع
كله شاييف نفسه ضحيه ** وشاييف غيره بس الجانى
عارف ليه عايش بتعانى؟! ** علشان إنك شخص أنانى
امتى يا ناس نعرف نتواصل؟! ** وخط الحب ما يبقاش فاصل
امتى يا ناس نفهم بعضينا؟! ** ونملا حياتنا بأحلى معانى
عارف ليه عايش بتعانى؟! ** علشان إنك شخص أنانى
شاييف نفسك دايمًا صح ** رافض تقبل رأى الثانى



حماة الوطن

تعظيم سلام ليكم ** واجب نحبيكم
انتوا الأسود أبطال ** حاميين أهاليكم
ضابط بطلنا همام ** يسهر عيوننا تنام
راجل ما يخشى الموت ** ما يوفى حقه كلام
لو شرطة ف يوم هتغيب ** نلقى الحياة أعاجيب
تبقى البلد غـابـة ** ما نشوف غير التخريب
شرطتنا شعارها نبيل ** للعدل قائمة دليل
شرطتنا دى منّا ** صيانة العهود وجميل
تعظيم سلام ليكم ** واجب نحبيكم
انتوا الأسود أبطال ** حاميين أهاليكم
يحموا الحدود بالروح ** صاحيين بليل ونهار
لو شمسهم هتغيب ** كل الأمان ينهار
مجرم يطيح فينا ** والعيشة تبقى مرار
كاشفين جريمة وزور ** مانعين خطر وشرور
واقفين كما الزنهار ** نجدة ودفاع و مرور

حارس يلف يطوف ** ينجذ يغيث ملهوف
روحهم على كفوفهم ** رمز الوفا الموصوف
تعظيم سلام ليكم ** واجب نحبيكم
انتوا الأسود أبطال ** حاميين أهاليكم
مجرم عتاه شارد ** بجناح ظالم فارد
لولا حماة الوطن ** يصبح كغول مارد
سهران في عز البرد ** واحنا ف بيوتنا الغطا
أكبر قيادة لفرد ** رمز النضال والعطا
حزم وعزيمة حديد ** عزم وإرادة شديد
أمه يا ناس واهباه ** يبقى لوطننا شهيد
تعظيم سلام ليكم ** واجب نحبيكم
انتوا الأسود أبطال ** حاميين أهاليكم

حال البشر

ربك بحال البشر ** وحده يا ناس عالم
الغدر بينا انتشر ** وضميرنا مش سالم
لو يعلا يوم دارك ** كتيير يبوسوا إيديك
لو لف الزمان دارك ** ما حد يبكى عليك
الكل انشغل بمصالحه ** ما حد فاضى لحد
لو ندل يوم هتصالحه ** يعض إيد تتمد
ربك بحال البشر ** وحده يا ناس عالم
الغدر بينا انتشر ** وضميرنا مش سالم
ابن الأصول معروف ** ف الغربة أو ف الضيق
مخلص يصون معروف ** ما يسيب فى زنقة صديق
لو ندل جات فرصته ** يدبح ما بيسمى
يكوى بنار قرصته ** يفرح بصوت همى
ربك بحال البشر ** وحده يا ناس عالم
الغدر بينا انتشر ** وضميرنا مش سالم
طبع الخسيس ببيان ** مهما يا ناس يداريه

عقرب وليها ذيبان ** يلسع فى إيد تداديه

ربك بحال البشر ** وحده يا ناس عالم

الغدر بينا انتشر ** وضميرنا مش سالم

اتغیرت کثیر

اتغیرت کثیر یا حبیبی ** اتغیرت کثیر

اتغیرت کثیر لیه قوللی؟! ** کنت بتسأل عنی تمللی

لیه بتخبی الضحکة دی منی ** ولیه بتشوفنی تطیر؟!

اتغیرت کثیر

اتغیرت کثیر یا حبیبی ** اتغیرت کثیر

کنت تقول ازای أنساکی ** نفسی أعیش العمر معاکی

وتقول کتر الشوق جننی ** وقلبك حبه کبیر

اتغیرت کثیر

اتغیرت کثیر یا حبیبی ** اتغیرت کثیر

لیه بتعذب فیا یا روحی؟! ** ولیه بتزود لیا جروحي؟!

ولیه بتدارى عیونك عنی؟ ** ! وانت عارفنی باغیر

اتغیرت کثیر

اتغیرت کثیر یا حبیبی ** اتغیرت کثیر

عربى ما زيه مثيل

العربى ما زيه مثيل ** عن الأصول أبدا ما يميل
خيريه يا ناس على كل العالم ** واسأل نهر فرات والنيل
أنا العربى ما حد مثيله ** وعوده بضره أخوه يتشد
وكل الدنيا يا ناس تشهدله ** وايديه بكل الخير تمتد
خيريه يا ناس على كل العالم ** واسأل نهر فرات والنيل
العربى ما زيه مثيل ** عن الأصول أبدا ما يميل
اسأل عنى الشرق و غرب ** واقروا تاريخ السلم وحرب
تلقى العربى صحيح إنسان ** كل حضارته شموع ع الدرب
أنا العربى ما زيه مثيل ** عن الأصول أبدا ما يميل
خيريه يا ناس على كل العالم ** واسأل نهر فرات والنيل
عربى وعمره ما يقبل ذل ** أبيض قلبه و زى الفل
عزه شهامة ورافع هامة ** ومداد ايديه بخير للكل
خيريه يا ناس على كل العالم ** واسأل نهر فرات والنيل
العربى ما زيه مثيل ** عن الأصول أبدا ما يميل

وراکي والزمن طويل

وراکي وراکي والزمن طويل

بس الصبر علیاً ** هتدوبی ف سحر عنیا

وهتلقی احساسک دق ** بالشوق واللهفة ورق

ومهما تروحي بعيد ** الغيرة وجمرة وتقيد

وتحسی بناری القايدة

وقلبک بکره یميل ** وقلبك بکرا یميل

انا صابر یاما علیکی ** ومسیر الشوق ینادیکی

طبعک دا عنید مش ساهل ** بس انتی غزال یستاهل

هاتلقی ومهما تدوری ** نجمک یلمع من نوری

هاسنتی لآخر العمر

دا جمالها مالوهش مثیل ** دا جمالها مالوهش مثیل

مهما تقسی وتعاندى ** کتیر الصبر دا عندی

انا عارفک سايقة دلالة ** وأنا شارى بمهرى حلالک

وقلبی دا لیکی عباً ** فحفى التقل دا حبة

والدور اللى أنت عایشه

میلقش علیک یا جمیل ** میلقش علیک یا جمیل

طول عمرك قاسى

طول عمرك تقسى عليا ** وانا قلبى يحن إليك
بتشوف الشوق ف عنيا ** وباشوف مكرك ف عنيك
بايديا اديلك الوردة ** وبلاقي الشوك ف إيديك
طول عمرك تقسى عليا ** وانا قلبى يحن إليك
طول عمرك كاسر خاطرى ** وتكثر كدا ف اللوم
ولا قارى حروف من سطرى ** ولا مرة ترن ف يوم
وتسير على موج عذالى ** وتعم على نفس العموم
طول عمرك كاسر خاطرى ** وتكثر كدا ف اللوم
غلطانة ف يوم حبيتك ** وكثير دا قالولى استنى
من دوون الناس عبيتك ** كان الف عريس متمنى
حبيتك وانا مش داريه ** والحب دا غصبن عنى
غلطانة ف يوم حبيتك ** وكثير دا قالولى استنى
دايما بتروح وتسيب ** القلب ف شك ونار
أيام وشهور بتغيب ** عنى وتسبينى احتار
اديتك أيوه أمان ** وطلعت كثير غدار
دايما بتروح وتسيب ** القلب ف شك ونار

يا خسارة

يا خسارة الليل اللي سهرناه ** واغانى العزف اللي سمعناه
ونسيت الحب اللي ابتديناه؟! ** واتهد الحلم اللي رسمناه
ولا حدش غيرى يشيل فى ملام ** ودموعى هسيبها تطفى آلام
علشان أتعلم درس كبير ** وما اصدق تانى لحد كلام
يا خسارة الليل اللي سهرناه ** واغانى العزف اللي سمعناه
ونسيت الحب اللي ابتديناه؟! ** واتهد الحلم اللي رسمناه
مخلص ولا عمرى لحد باخون ** وبراعى العشرة معاى وباصون
ليه بس كتير يغدر ويبيع؟! ** والحب يا ناس يرخص ويهون
والحب يا ناس يرخص ويهون
يا خسارة الليل اللي سهرناه ** واغانى العزف اللي سمعناه
ونسيت الحب اللي ابتديناه؟! ** واتهد الحلم اللي رسمناه

الطير المسافر

يا طير مسافر رايح فين؟! ** بُعدك بيكوى على الجنين
إياك تسيبني تروح لبعيد ** دا انا قلبي واحد مش قلبين
يا طير مسافر فين رايح؟! ** بُعدك هنصبح فى جراح
والكون ده كله عليا يضيق ** ملقاش فى دنياتى برايح
يا طير مسافر فين قولى ** دا انت عبير عمرى وفلى
بُعدك هتبقى الدنيا جفاف ** وحدى هاعيش شوقى وذلى
يا طير مسافر فين هتروح ** قربك وريدي ونبض الروح
عشك تسيبه حبيبى لمين؟! ** بُعدك حياتى هتبقى جروح
شعر وشعور انت ومعنى ** بُعدك حياتى بلا معنى
ياطيرى أنت بلاش تهجر ** لو نبكى مين راح يسمعنا؟!

لا .. للإرهاب

فين هو الدين اللى يقولك اقتل ف الناس؟!
ولا مين خلاك كدا متشوش معدوم احساس؟!
طاب مين بيمول يديك توجيه وسلاح!
ولا مين بيقولك يفتيلك دا جهاد وكفاح!
ماشى بالفتنة و بتدمر ف شمال ويمين
فين هو الدين اللى يقولك اقتل ف الناس؟!
مين قال لك تقتل وتفجر...هتخش الجنة
مين قال لك خاصم أو هجر احمد او حنا
طاب مين سمم لك أفكارك بغسيل للمخ؟!
مش عايز لحن يكون غنوة ولا مطرة ترخ
بتهد كنيسة او جامع فين هو الدين؟!
فين هو الدين اللى يقولك اقتل ف الناس؟!
منزوعة الرحمه من قلبك عكس المفاهيم
مليان بالغل واحقادك مغرور بتهيم
كاره بلدانك أوطانك طب مين خلاك
تصبح ارهابي وبتمشي ف السكه هلاك
عقلك متبرمج متلقن يا ابن الملاعين

كنت طيب

ياللى قلبك كان حنين ** لونه أبيض م الحليب
والكلام عسول ولين ** اللى يسمع بيه يطيب
ليه تطير على عش تانى؟! ** وعن عيونى تروح تغيب؟!
ياللى قلبك شهد صافى ** كله رقة وفيه حنان
ليه بتبعد ليه تجافى ** وقلبي كان مديك أمان
شئ مؤكد إن قلبك ** بكره يندم إنه خان
ياللى قلبك كان جناين ** عطرها دايمًا يفوح
فوق ورودها الحب باين ** يروى قلب ويروى روح
لو هاتجر يوم تسيبنى ** روحى بعدك فين تروح

لعبت يا زهر

ما خلاص لعبت يا زهر ** واتجمعوا الجنيهاات
واللى زمان صدنا ** جابوا النصيب حدنا
راجع يا ناس محتاجلى ** جانى يقوللى هات
ماخلاص لعبت يا زهر ** واتجمعوا الجنيهاات
ما خلاص لعبت يا زهر ** والقرش ف ايدى جرى
واللى زمان باعنى ** انا برضه ليه مشترى
أصل الأصيل ياناس ** راح تكشفه الأزمان
مايسيشى يوم صاحبه ** ولا يطعنه ف الضهر
ما خلاص لعبت يا زهر ** قادت شموع عيدى
واللى زمان صدنى ** راجع يقول سيدى
راجع يا ناس يعتذر ** عايز يبوس إيدى
أنا هانسى كل ندالته ** هافتح في وشه بيبان
وهامد إيدى إليه ** وافرح سعادته تبان
واللى يعوزه ليه ** ولا عمرى راح أجرحه
م الموجه هنعديه ** ما انا كنت يوم مطرحة

ما خلاص لعبت يا زهر ** والرزق جه للباب
ونسينا دمع القهر ** بقت العدا أحباب
ما خلاص لعبت يا زهر
بعد العذاب والشقا ** واللف والتخييط
قلنا كفايه بقا ** هنعيش يومين تزبيط
ما خلاص لعبت يا زهر ** واتجمعوا الجنيهاات
واللى زمان صدنا ** راجع يقوللى هات
ما خلاص لعبت يا زهر

ودعناه

ودعناه الشهر الطيب ودعناه ** بعد ما جانا احنا وصومناه

كان الرحمة يا ناس والتقوى ** والتراويح وسحور وزكاه

ودعناه والعين بتدمع ** كان بالخير والحب يجمع

شهر البركة والغفران ** ودرس الصبر اتعلمناه

ودعناه الشهر الطيب ودعناه ** بعد ما جانا احنا وصومناه

شهر عبادة وفرض الصوم ** تصحى نفوس من غفلة ونوم

مشبعناش من خيره ورزقه ** مشبعناش م القعدة معاه

ودعناه الشهر الطيب ودعناه ** بعد ما جانا احنا وصومناه

ودعناه وبشوق نتمنى ** يرجع تاني عشان نتهنى

عدى علينا زى النسمة ** راح وقلوبنا بتستناه

ودعناه الشهر الطيب ودعناه ** بعد ما جانا احنا وصومناه

كان الرحمة يا ناس والتقوى ** والتراويح وسحور وزكاه

ضحكة حبيبي

شو ضحكة حبيبي ** حلوة ماليها مثال
عيني يا دوب لمحتها ** خلت قلبي مال
فين زيها قولولي؟! ** ضحكة بفرحه تلع
حلو السنان اللولى ** منها الضيا يشع
شو ضحكة حبيبي ** حلوة ماليها مثال
عيني يا دوب لمحتها ** رققت و قلبي مال
ضحكاتك حنية ** منها القلب يحن
شو صوت الغنية ** جوا ودانى يرن
شو ضحكة حبيبي ** حلوة ماليها مثال
عيني يا دوب لمحتها ** خلت قلبي مال
حبيبي ضحكاته ** حلوة بجد كثير
حتى كمان ف سكاته ** منو الناس بتغير
شو ضحكة حبيبي ** حلوة ماليها مثال
عيني يا دوب لمحتها ** خلت قلبي مال

كان ف ایدی

كان فی ایدی و بین عنیا ** و كنت اشوف حبی ف عینیہ

كان یخاف دایماً علیا ** و كنت أقسی کثیر علیہ

قلبی سابه یعیش عذابه ** قلبی فعلا کان انانی

كان بیدینی الأمان ** و سری دایماً کان یصونه

بین ایدیہ شوقت الحنان ** والهوی زهزه غصونه

دا الحبيب لو یوم یغیب ** م الفراق الروح تعانی

لما کان یجی یقابلنی ** ألف مرة أسیب معاده

كان بیعشقتنی وقابلنی ** ویشتی من نار بعهاده

كان یئن ولو یرن ** كنت اسیبه یرن تانی

مصر حلوة وجميلة

مصر حلوة يا ناس جميلة ** والجمال معجون بناسها
لو نفوس يوم جات عليه ** تشفى لو تشرب بكاسها
مصر حلوة يا ناس جميلة ** والجمال دا فيها حصري
والجمال ف الدنيا كله ** يحسدك ان انت مصري
مصر حلوة يا ناس جميلة ** والجمال مخلوق حدانا
وقبل ما الدنيا تفتح ** كنا نزرع فاح ندانا
مصر حلوة يا ناس جميلة ** والجمال فينا ومنا
نهر نيل عطر ترابنا ** انعجن بالمسك حنى
الجمال مخلوق حدانا ** ومن عيون مصر انتشر
لما تيجي تشوف طبيبتنا ** تقول ملايكة دى مش بشر
الجمال دا شيء وراشى ** والحلاوة طبع باين
ع الحيطان محفور تراشى ** وعين تشوف لو جات تعالين

مين زيڪ

ف الدنيا ديه ...زيڪ انت مافيش كتير

طاب ليه بتلومنى وليه تعاتبنى

لمّا قلبى عليك يغير

مش عارف انت حبيبى حلاوتك

وقد ايه عندى غلاوتك

دا انا حبى ليك سوپر فاخر

وبيه حبيبى انا بتفاخر

نفسى أشيلك ف عيونى

واخذك على كون تانى واطير

**

ف الدنيا ديه ...زيڪ انت مافيش كتير

طاب ليه بتلومنى وليه تعاتبنى

لمّا قلبى عليك يغير

..

آخر شياكه ومين أدك ..خايفه عليك من حسادى

والورد فتح على خدك..والنظرة منك مش عادى

ولمسة ايدك فيها حرير

ف الدنيا ديه ...زيك انت مافيش كتير

طاب ليه بتلومنى وليه تعاتبنى

لما قلبى عليك يغير

صعب أنساکی

بعد ما دوبت کتیر ف هواکی

امتی العشره الحلوہ تھون؟! ** مین لحبیب القلب یخون

أجمل حاجه قلبی عایزها

إنی أكون دایماً ویآکی . . صعب أنساکی

بعد ما دوبت کتیر ف هواکی

مهما اشوف القسوه ف عینک ** سر الحب دا بینی و بینک

أحلى سنین العمر قضیتها

هیه سنین العمر معاکی . . صعب أنساکی

بعد ما دوبت کتیر ف هواکی

مهما أدارى مشاعری واخبی ** انت حیاتى وأجمل حبی

لسه ساکنه ف شرایین قلبی . . صعب أنساکی

بعد ما دوبت کتیر ف هواکی

شایل جوا القلب غلاوتک ** خفۃ روحک ویا حلاوتک

مهما عنى یا روحى غیبتى

عمرک کله هاقول یا حبیبتى .. صعب أنساکی

جلا .. جلا

جلا .. جلا ** الرقص يبدأ حنجلة

ف عيون حبيبتي ألف حيرة ** والقلب دق إن جبننا سيرة

لكن بضحكة ع الخدود ** سر الغموض بان وانجلا

جلا..... جلا.. الرقص يبدأ حنجلة

والزمر يضرب على طبلى ** بالأمر غصنك كدا طابلى

بستانى زهره بجناينه ** لو نظرة منك هاتعاينه

قبل المواسم يستوى ** والرمش يصبح منجلة

جلا..... جلا.. الرقص يبدأ حنجلة

وف نن عينك نلتقى ** شهد الوداد أبيض نقى

نلقى النجوم متبسمة ** اخلاص قلوب نلقاه سِمة

منظر حياتنا مبهج ** تشبع عيونك فنجلة

جلا..... جلا.. الرقص يبدأ حنجلة

يا ضحكك بندهلك

يا ضحكك بندهلك ردی ** تايهه نجيبك بس منين
امتى يافرحه تناديلی ؟! ** ضيک ينور قناديلی
ماشى ودمعى على خدی ** م الحزن دابت مناديلی
يا ضحكك بندهلك ردی ** تايهه نجيبك بس منين
يا فرحه ليه بتخاصميننا ** دا الحزن قرّب يعميننا
واخدانا موجه م الأحزان ** امتى هنرسى على ميننا
يا ضحكك بندهلك ردی ** تايهه نجيبك بس منين
يا ضحكك بندهلك عودى ** ده الدمع علم ف خدودى
والقلب عطشان للفرحه ** نفسه يغنى على عودى
يا ضحكك بندهلك ردی ** تايهه نجيبك بس منين
يا فرحه امتى هنتهنى؟ ** لينا سنين و بنستنى!
لينا سنين بنقول الآه ** قصة جراحنا بتتغنى
يا ضحكك بندهلك ردی ** تايهه نجيبك بس منين

زغروتين

سمعت زغروتين ** طالعين من شقتك
سألت قالولى ديه ** مناسبة خطبتك
وجايه الناس بترقص ** وتهنى بفرحتك
وعريسك مد إيدده ** بيلبس دبلتك
سألت مين قالولى ** دا ابن عمك
مغصوبه عليه يا ناس ** قالولى دى رغبك
مش كنا امبارح نحكى ** انا وانتى ف قصتك
وقلتى أنت حبيبى ** ولا حد ف سكتك
والحب معاى بيكبر ** وباكتب غنوتك
وقلت يا ماما تدعى ** إنى ابقى قسمتك
وقعدت أسهر ف ليلى ** وأرسم ضحكك
وجبت فلوس زياده ** لهدية شبكتك
طاب ليه الغدر فجأه؟! ** تقابلني قسوتك
وجايه تعزمينى؟! ** كمان على دخلتك
لما أنت مش عايزانى ** بتخدعيني ليه؟!
ولا كنتى عايزه ** واحد يسلى وحدتك

مش من صالحك

مش من صالحك ** إنك تلعب بيا تهزر
كلمه بقولها آخر مرّه ** وفيها بحذر
اوعى تفكر إن كرامتى ** ممكن لحظه عليّا تهون
اوعى تفكر إنك ممكن ** تخدع قلبى وليّا تخون
كلمه بقولها تانى اسمعنى ** اوعى تصدق وتقول يعنى
قلبي ف حبك صار مجنون
مش من صالحك ** تانى بقولها بشكل صريح
مش هاسمحك إنك تضحك ** وتشوف قلبى معايا جريح
اوعى تكون مخدوع من طيبتى ** ولا بكلمة إنتى حبيبتى
إياك تلعب بيا تهزر ** آخر مرّه بقول وبحذر
مش من صالحك

سببت الحقيقه

سببت الحقيقه عشان خيال ** وحبى ضاع من كلمتين

قلبك اليها بسرعه مال ** لما شوفت الغمزتين

ولسه فيه ألف احتمال ** تتخدع من ضحكتين

بس شئ اصبح محال ** انك تعيش الفرحتين

كنت تتقل حبه حبه ** وقلبي يدك الأمان

هيه دى آخر المحبه ** هوه ده آخر الحنان

مهما غدرك يستخبي ** قلبي ليك عمره ما خان

كل وهمك كان امانى ** سببت المظاهر تخدعك

لما شوفت انك انانى ** قلبي خلاص هيوذك

لو هاتبعد عنى تانى ** مافيش طريق هيرجعك

سببت الحقيقه عشان خيال ** وحبى ضاع من كلمتين

ما تستغريش

ما تستغريش... ليه انا معرفتكيش

ما انتى غايبة من زمان ** سييتى حب وقلتى كان

واختفيتى عن عيونى ٠٠ وافترقنا

وقلتى تانى ماترجعيش ** ومن ساعتها ماشوفتكيش

ما تستغريش ليه انا معرفتكيش

ضحكتك بقى لونها باهت ** عايزه بس يادوب تعيش

والملاح منى تاهت ** حتى مكياجك مافيش

ما تستغريش ليه انا معرفتكيش

دا الهموم بانى عليكى ** والكلام مالى عنيكى

والسنين لمست ايديكى

فين عيونك لما تبرق؟! ** صورة منها بميت أفيش

يا ما عنك كنت بسأل ** وانتى عنى متسألش

ما تستغريش ليه انا معرفتكيش

انسان زيڪ

زيڪ طبعاَ انا انسان ** ليه تسيبوني اعيش متهان؟!
ليه بنحس الغربية معاكوا؟! ** ليه ف قلوبكوا مالينا مكان؟!
بص بقلبك شوفنى انا مين ** انا محتاج لحد حنين
ياخد بايدى و يسند حلمى ** ويمسح دمع معاى وأنين
زيڪ طبعاَ انا انسان ** ليه تسيبوني اعيش متهان؟!
ليه نظرتكم قاسية أليمة ** ان انا عالة وملهوش قيمة
واللى بيغمز واللى بيلمز ** واللى يحطم لينا عزيمة
زيڪ طبعاَ انا انسان ** ليه تسيبوني اعيش متهان؟!
ليه تجرحنى بكلمة تغص؟! ** فينا مواهب شوفها و بص
دا احنا السر الكامن فينا ** ربك لمّا بيدى يخص
زيڪ طبعاَ انا انسان ** ليه تسيبوني اعيش متهان؟!
كله بياخد فينا نصيبه ** فرح وجرح ف دنيا يصيبه
ليه بتجرح لينا شعورنا ** والمحتاجلك ليه بتسيبيه؟!
زيڪ طبعاَ انا انسان ** ليه تسيبوني اعيش متهان؟!
ليه بنحس الغربية معاكوا؟! ** ليه ف قلوبكوا مالينا مكان?!

أنا أستاذ

ايوه حقيقي أنا أستاذ ** علشان كنت معاك بتساهر
كنت بتقسي عليا واسامحك ** تعمل فيها كبير وأصالحك
وتسوق فيها وبتجرّحني ** ويكون ردّي عليك بالساهر
ايوه حقيقي أنا أستاذ

بس خلاص أنا خدت قرار ** بعد ما قلبى دليله احتار
ازاى قلبى يحبك تانى؟! ** وازاى يسأل برضو عليك
م اللحظة دي أنا رايحة أسيبك ** تندم تبكى بدمع عينيك
لازم تعرف قيمة حبي ** لو معملتش كدا ويّاك
أبقى حقيقي أنا أستاذ

اتحملتك ايوه كتير ** بس خسارة مافيش تقدير
كنت اتحمل لك فى دلاك ** رغم دموعى كانت تحلاك
كنت باصبر فعلاً نفسى ** علشان مركب حبي تسير
وبالحنية عليك بزيادة

وكنت معاك دايمًا بتساهر ** ايوه حقيقي أنا أستاذ ..
كنت بتقسي عليا واسامحك ** تعمل فيها كبير وأصالحك
وتسوق فيها وبتجرّحني ** ويكون ردّي عليك بالساهر

صباح الخير

صباح الخير على المدنه ** صباح الخير على الأجراس

صباح الورد بين إيدنا ** صباح العزة لجنودك

صباح نصرك دا يوم عيدنا ** وجيش صامد على حدودك

أسودك صاحيه تحميكي ** عيون حراس

صباح شمسك مع نيلك ** صباح بسام و متعطر

تاريخ أهرام يغنيك ** سماكى بفرحة بتمطر

يا كلمة حب فى قلوبنا ** يا تاج الراس

صباح نسمة مع الفلاح ** بتضحك لك بأحلى شروق

صباح بسمه على الملاح ** وموج بحرك أكيد هيروق

يا نبع الضى فى الدنيا ** وضوء نبراس

صباح الخير وبنسلم ** صباح بهجة ومش عادى

صباح برعم بيتعلم ** حروف اسمه وبينادى

ويتهجى حروف اسمك ** على الكراس

صباح الخير على المدنه ** صباح الخير على الأجراس

لا للتحرش

فين الحياء فين الأدب ؟! ** ليه الحكاية بقت عجب ؟!

اللى بيعاكس فى حُرْمه ** الضمير عنده احتجب

احنا مش عايشين فى غاب ** فيه لياقة و فيه أصول

ماشى تنهش كالذئاب ** إنت سهران ولأ غول ؟!

لو هاتجرح يوم قيمتها ** يبقى تتحمل جزائك

والقانون منك ينول

فين الحياء فين الأدب ؟! ** ليه الحكاية بقت عجب ؟!

لمّا بتضايق فى ست ** كل أصلك راح بيان

ولا تأذى شعور لبت ** تبقى بالتأكد جبان

هيه أختك هيا أمك ** كلنا لازم نصونها

و حقها تلقى الأمان

فين الحياء فين الأدب ؟! ** ليه الحكاية بقت عجب ؟!

اللى بيعاكس فى حرْمه ** الضمير عنده احتجب

ليه بتجرحها بغلاستك ؟! ** لا فيه مروءة ولا شهامة

دا السلوك عنوان هلاستك ** رمز من بيتكم علامة

اللى يآدى شعور ها يبقى ** شخص فعلا غير سليم

و يجنى من فعله الملامة

فين الحياء فين الأدب؟! ** ليه الحكاية بقت عجب؟!

إلى بيعاكس فى حُرْمه ** الضمير عنده احتجب

مراية الحب عميا

دا مراية الحب عميا ** واهو مين أصلا بيبص؟!
مش عارفة تقمع بامية ** ولا حتى رموشها تقص
دا مراية الحب عميا ** وانا ايه بس اللي عمانى؟!
دا انا قاطع السمكة وديلها ** والبحر ف موجه رمانى
دا مراية الحب بريئة ** وقالولى شوفها وعاین
ضحكتها الحلوة جريئة ** وكثير متخبى ما باين
دا مراية الحب عميا ** واهو مين أصلا بيبص؟!
مش عارفة تقمع بامية ** ولا حتى رموشها تقص
شدتني يا ناس بكلامها ** واديتها بطيبتى أمان
مش باين حتى علامها ** بتعيش ع الفقر زمان
على عينك نقى يا تاجر ** الصبح مفيهش كسوف
ماكياجها يا ناس زغولنى ** وعميت مش قادر اشوف
دا مراية الحب عميا ** وأهو مين أصلا بيبص؟!
مش عارفة تقمع بامية ** ولا حتى رموشها تقص

آخر تحذير

كل ما احبك قلبك يقسى ** ليه باخلصك وانت تخون؟!
كل ما اقرب بالقاك تنسى ** تسييني ف حيرة ونار وظنون
اهدي وقول لقلبك يرسى ** لاحسن حبك عندي يهون
ياما كتير صبرت عليك ** ألفين فرصة وعذر اديتك
مين هيجبك أكثر مني؟! ** و ياما بايدى الحب سقيتك
ليه خليتني أحاسب نفسي؟! ** واندم اني في يوم حبيتك
كل ما احبك قلبك يقسى ** ليه باخلصك وانت تخون..
كل ما اقرب بالقاك تنسى ** تسييني في حيره ونار وظنون
إلحق قلبي خلاص هيسيبك ** آخر فرصة حقيقي معاك
كنت باقولك انى حبيبك... مهما كتيرة قلوب بايعاك
قلبي ان سابك مش راح يرجع ** ويسيب كل ماضيه ويّاك
كل ما احبك قلبك يقسى ** ليه باخلصك وانت تخون؟!
كل ما اقرب بالقاك تنسى ** تسييني في حيره ونار وظنون
اهدي وقول لقلبك يرسى ** لاحسن حبك عندي يهون

وسَّعَ للأناقة

طاب وسَّعَ للأناقة ** والروعة والرشاقة

طاب تعمل إيه يا قلبي؟! ** لَمَّا تشوف الحلاوة

بتغنى مع الجمال

يا عيني ع التسريحة ** وَلَا الخطوة المريحة

طاب تعمل ايه يا قلبي؟! ** لَمَّا تشوف القمر

مرسوم ف عيون غزال

ما تشوفوا الطلة الرايقة ** والمشية الحلوة العايقة

طاب تعمل إيه يا قلبي؟! ** والنور في جبينها بيلمع

ماخطرشى ف يوم على بال

طاب تعمل ايه يا قلبي؟! ** لَمَّا تشوف الشياكة

ماشيه ف رقة ودلال

اللى باع

اللى باع يا قلبى بيعه ** واستريح من عذابه
كنت تروى غيطان ربيعته ** وترسم الفرحة ف كتابه
او عى تزعل يوم عليه ** وللا تفتح يوم عتابه
اللى باع يا قلبى سيبه ** وانت كسبان القضية
او عى تقبل بالمساومة ** كسر قلب مالو هوش ديه
سببه هيدوق المزار ** هو ذات نفسه اللى جابه
اللى باع يا قلبى بيعه ** واستريح من عذابه
اللى باع دايمًا بيخسر ** شوف بعينك ألف عبرة
أيوه قلبك عاش له صدمة ** بس خدت الدرس خبرة
وكل موج جرحك يعدى ** وبكره تتعود غيابه
اللى باع يا قلبى بيع ** واستريح من عذابه
اللى باع مايستاهلش ** أى دمة ف يوم عليه
واللى يجرح قلب مخلص ** بكره يطلع من عينيه
راح يعيش العمر كله ** يبكى ع القلب اللى سابه
اللى باع يا قلبى بيعه ** واستريح من عذابه

ست سامية...طابخة بامية

عاملة محشى مع الكوارع ** ريحته فايحة ف الشوارع
المدام دى شاطرة خالص ** احلى أكل تدوق يا بيه
رز متفلنل معمر ** واللى مقلى والمحمّر
بس خفى يا ريت شوية ** راح تقول يا خلق هيه
جايبة فول ويا الفلافل ** والديلفرى اليوم دا حافل
وارحمى جوزك يا هانم ** لا الحساب يتقل عليه
والنهاردة الحلو كيكة ** أى خلطة تكون عكيكة
بس لازم يعنى نصرف ** طول ما شايقة معاى جنية

ست سامية...طابخة بامية

مشروبات ساخن وبارد ** فكرى دايمًا عندى شارد
عاملة مانجة مع الطماطم ** قرفة جنب النسكافية
والتسالى تين وموز ** كيلو فستق ويّا لوز
وزنها عن طن زايد ** ونفسها ترقص باليه
عيد ميلاد القطة إيما ** عاملة حفلة زى سيما
داعية كل الناس ياباشا ** والعزومة او بن بوفيه

ست سامية...طابخة بامية

والكابوريا واستاكوزا ** بلطى يامه مالوهش عوزة
والنهاردة التونة خلصت ** واوعى تنسى تجيب فيليه
وجايبة أعلى لبس موضدة ** عايزة قصر بألف اوضة
لما أنت ياخوى فقير ** جاى ومتجوزنى ليه؟!
شكلها هبله وغبية ** ليه يا ناس مش حاسة بيا؟!
المرتب حالته حالة ** وهى يعنى عليها إيه?!

ست سامية...طابخة بامية

شكلها فعلا عبيطة ** سامعة كلمة مش بسيطة
لما جوز الست يغنى ** راح يا هبله تزوغ عينيه
هدى حيله بالعيال ** وقصقصى القرش ف إيديه
ست سامية...طابخة بامية
وأحلى أكل تدوق يا بيه

حَوَّا

اللي ما يقدرش حَوَّا ** يبقى مخه بجد هَوَّا
هي نسمة ف حر صيفنا ** هي اجمل لون في طيفنا
هي نبع الحب كله ** هي عطر الكون و فله
ويله يا اللي مره شاتها ** ده الجمال مخلوق عشناها
والونس لو دنيا تقسى ** ده الحنان من صوتها دَوَّى
اللي ما يقدرش حَوَّا ** يبقى مخه بجد هَوَّا
ياللي مش مؤمن بدورها ** بص شوف الست أمك
بص على النجمة وبدورها ** في الضلام بالنور تضمك
اللي شالت واللى دلت ** عمرها منك ما ملت
من حشاها خدت قوتها ** خدت كل العمر منها
وصدرها بالحب رَوَّى
اللي ما يقدرش حَوَّا ** يبقى مخه بجد هَوَّا
هي بنتك فرع منك ** قوول ضناك
هي اختك زي ضلك ** سعداها من نور هناك
الطيور بتغني ليها ** والزهور فرحانه بيها
ربنا خلاها نعمة ** لجل ماتنور حياتنا

ومنها كل الحب سوَّى

اللي ما يقدرش حوّا ** يبقى مخه بجد هوّا

بص شوف زوجتك حبيبتك ** اللي صاينالك في هيبتك

اللي شايله معاك في همك ** لوبتيجي الموجة يمك

او زمان بيدور عليك

تسندك من كل ميلة ** حبها ع الضعف قوَّى

اللي ما يقدرش حوّا ** يبقى مخه بجد هوّا

الشاعر في سطور

- الشاعر راضى على الطهطاوى
- سوهاج .طهطا ..عرب بخواج...مواليد ١٩٧٨
- عضو اتحاد كتاب مصر
- ليسانس الآداب والتربية قسم اللغة الانجليزية
- دبلومة مهنية دبلومة خاصة بالدراسات التربوية...
- باحث ماجستير جامعة المنيا
- معلم أول أ ثانوى لغة انجليزية
- عضو نادى الأدب بطهطا
- محاضر مركزى بوزارة الثقافة
- صفحته على فيس بوك

<https://www.facebook.com/profile.php?id=١٠٠٠٧٩٤٣٨٥٩٥٥٨>

٠٠٠٧٩٤٣٨٥٩٥٥٨

صدر له

- ديوان / همسات القلب - شعر عامية ٢٠١٠
- ديوان / همسات الروح - شعر عامية ٢٠١٠
- ديوان / همسات انسان - شعر عامية ٢٠١٠

ديوان / الضحك الصينى المستورد - شعر عامية ٢٠١١ ديوان /
دموع قلم - شعر عامية ٢٠١١
ديوان / مازالت الضحكة فى جيبى شعر عامية - ٢٠١١
ديوان / بحار بلا مجداف - شعر عامية ٢٠١١
ديوان / شعاع جوا حيطان الضلمة - شعر عامية ٢٠١٢
ديوان / ومازال الحلم يحبو - شعر عامية ٢٠١٢
قاموس فى اللغة الانجليزية... القاموس المتناغم ٢٠١١
ديوان / فنجان القهوة اللي بيضحك - شعر عامية ٢٠١٨
ديوان / بكاء قصيدة - شعر فصيحى ٢٠١٨
ديوان / ضحكة فوق وش الضي - شعر عامية ٢٠١٨
ديوان / حبة مشاعر ع الورق - شعر عامية ٢٠١٩
حاصل على عدة جوائز وشهادات تقدير من كثير من المحافل الثقافية
له مداخلات ولقاءات إذاعية وتلفزيونية عديدة
له كلمات مغناه على اليتيوب لبعض الأصوات الفنية الشابة

الفهرس

م	القصيدة	الصفحة
١	بطاقة الكتاب	٢
٢	الإهداء	٣
٣	رسول الإنسانية	٤
٤	أمي سر وجودي	٥
٥	غلطة عمري	٦
٦	هل هلاله	٧
٧	الحلو الأمور	٩
٨	دنيا ماشية بينا	١٠
٩	شهر الصوم	١١
١٠	خف الحلاوة	١٢
١١	وانتهينا	١٣
١٢	ألف سلامة	١٤
١٣	يا ابو العريس	١٥
١٤	نونو صغير	١٦
١٥	فرحة دنيتي	١٧
١٦	الواد النونو	١٩
١٧	سوهاج	٢٠
١٨	او عى تصدق	٢١
١٩	محمد نبينا	٢٢
٢٠	سامحيني يا أمي	٢٣
٢١	عجوز بيعاكس	٢٤
٢٢	راجع ليه	٢٥

٢٦	متسبلش عينيك	٢٣
٢٧	أغنية الغربية	٢٤
٢٨	إدعيلي يامه	٢٥
٢٩	مالك يادنيا	٢٦
٣٠	شعب واحد	٢٧
٣١	عيد الميلاد	٢٨
٣٢	عاشق لجيشنا	٢٩
٣٣	سكة النسيان	٣٠
٣٤	وافترقنا	٣١
٣٥	امتى الفرع	٣٢
٣٦	يا عريس الليلة	٣٣
٣٧	تاج النصر	٣٤
٣٨	كلام الناس	٣٥
٣٩	دباديبو	٣٦
٤٠	رؤق	٣٧
٤١	هلت ليالي الخير	٣٨
٤٢	نهاية حبنا	٣٩
٤٣	التار	٤٠
٤٤	عريس م الفرحة	٤١
٤٥	مصرنا تنده	٤٢
٤٦	زي مانت	٤٣
٤٧	مالك حبيبي	٤٤
٤٨	نار هجرك	٤٥
٤٩	مين علمك	٤٦
٥٠	بكره تعرف	٤٧

٤٨	أغلى الناس	٥١
٤٩	خسرتك	٥٢
٥٠	خاين	٥٣
٥١	ارجع ليها	٥٤
٥٢	ليه بتعاني	٥٥
٥٣	حماة الوطن	٥٦
٥٤	حال البشر	٥٨
٥٥	اتغيرت كتير	٦٠
٥٦	عربي مازيه مثيل	٦١
٥٧	وراكي والزمن طويل	٦٢
٥٨	طول عمرك قاسي	٦٣
٥٩	ياخسارة	٦٤
٦٠	الطير المسافر	٦٥
٦١	لا.. للإرهاب	٦٦
٦٢	كنت طيب	٦٧
٦٣	لعبت يازهر	٦٨
٦٤	ودعناه	٧٠
٦٥	ضحكة حبيبي	٧١
٦٦	كان ف ايدي	٧٢
٦٧	مصر حلوة وجميلة	٧٣
٦٨	مين زيك	٧٤
٦٩	صعب انساكي	٧٦
٧٠	جلا ٠٠ جلا	٧٧
٧١	ياضحكة بندهلك	٧٨
٧٢	زغروتين	٧٩
٧٣	مش من صالحك	٨٠

٧٤	سبب الحقيقة	٨١
٧٥	ما تستغربيش	٨٢
٧٦	انسان زيك	٨٣
٧٧	انا استاهل	٨٤
٧٨	صباح الخير	٨٥
٧٩	لا.. للتحرش	٨٦
٨٠	مراية الحب عميا	٨٨
٨١	آخر تحذير	٨٩
٨٢	وسع للأنافة	٩٠
٨٣	اللي باع	٩١
٨٤	ست سامية	٩٢
٨٥	حوا	٩٤
٨٦	الشاعر في سطور	٩٦
٨٧	الفهرس	٩٨